

Nunatta Qitornai

Inatsisartuni



16. oktober 2018

UKA2018/189

Uunga siunersuut: Kalaallit Nunaanni annaassiniarnissamut upalungaarsimaneq aamma ikualattoornissamik qaartoonnissamillu pitsaaliuinermi iliuusissat pillugit Inatsisartut inatsisaata allanngortinneqarnissaa pillugu Inatsisartut inatsissaat nr. xx, xx. Xxx 2018-meersoq
(Aleqa Hammond, Nunatta Qitornai)

Inuiattut ukiuni kingullerni upalungaarsimanissakkut annaassiniarnikkullu piareersimalluinnarnissap, suleqatigiilluinnarnissap aammalu pikkorissaajuarnissap qanoq pingaaruteqarluinnartiginera nunatsinni takusimalerparput.

KANUKOKA-p atorunnaarsinneqarnerata kinguneranik Upalungaarsimanermit Ataatsimiititaliami ilaasortassaminnik toqqaasarnerigaluat maanna allannguuteqarfingeqarpoq, tamannalu aamma paasinarpoq pissusissamisoorlunilu.

Upalungaarsimanermit Ataatsimiititaliaq katitigaavoq, ataatsimiitsitaliap Naalackersuisunut siunnersuinerani ilisimasat misilittakkallu Naalackersuisut, kommunit, Kalaallit Nunatsinni politiit, Nakorsap peqqinnissakkut nakkutilliusup, Arktisk Kommando aamma Naalagaaffiup Sinniisoqarfiup akornanni suleqatigiinnikkut pissarsiarineqarsinnaasut tunngavigalugit ingerlanneqartussanngorlugu.

Pinngitsoorumangilagut siorna Uummannap sulluani Nuugaattaani alianaqisumik qarsutsinersuaqarmat ajunaartut, annaasaqartut erloqitinneqartullu misiginneqataassummik maana aamma apuussivigissallugit.

Inissiinissanut aaqqiissutissat suli tamarmik aaqqeqqajangillat aammalu illussamik taarsiissutissanik tamarmik iserteqqajangillat, taammaamat suliap ingerlanerani naalackersuisunut kaammattuuteqarumavugut suliap qanimut malinnaaffigineqarnissaanut paasissutissiinermilu tamarmik peqataaffigisaannik apuussinissaq pingaarteqqullugu.

Ilanngullugu qutsavigiumavagut ajutoornersuaqarnerani Uummannami ikiuttut, ataqatigiissaarisut, nunatsinni peqqinnissaqarfimmi aqutsisut, air greenlandip timmisartortartui, Issittumi sakkutooqarfik, qatserisartut, innuttaasut, ilaqutaasut nunaqqattivullu tamarmik annertuumik ikiuunnerinut tunuliaqutaanerannullu.

Piareersarluarsimanerup, ataqatigiissaarillaqqinnerup, ataatsimiititaliap inulersorneqarnerisigut isumatusaartumik katiterisimanerup aammalu sulingasuarnissamut malitassaqarluarnerup sulineq sukkasooq, ikiuigasuarneq akuutitsilluarnerlu anguneqarpoq. Taakku nersorlugit pattalaarpavut qutsavigalugillu.

Nunatta Qitornai

Inatsisartuni



Taamatut oqaaseqarluta annaassiniarnissamut upalungaarsimaneq aamma ikuallattoornissamut qaartoonissamullu pitsaaliuinermi iliuusissat pillugit Inatsisartut inatsisissaattut siunersuut akuersaarparput, taamalu isikkoqartillugu akuerineqarnissaa innersuullugu.